



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir\_yimiyim



tir yimiyim

TAPAK 7

Board of Peace senden nung India-a Observer ama aden

Imran Khan-i "political deals" ana magizük: Rana Sanallah



VOL. XXIII ISSUE NO. 129 (ADOK 129) DIMAPUR KÜPTOKNÜ (SATURDAY) TSÜKLAI (FEBRUARY) 21, 2026 ₹ 5.00

## NSF-i MHA tetuyuba magizüker

**Dimapur, February 20, 2026 (TYO):** Ministry of Home Affairs-i shisaliok rejutem dena tongtipang sentongtem nung National Anthem Jana Gana Mana matandang Indian National Song Vande Mataram mezüing atemtsü mesüra atemtsü tetuyuba agütsüba magizüker ta Naga Students' Federation (NSF)-i metetdaksüogo.

Iba tetuyuba ajanga school tem nung National Song aser Anthem atema telatet ka agütsür aser iba ya Naga nung putiotsü, yimtenren aser sobalibaren den meputep ta NSF-i ashi.

Indian Constitution nung Arrla 51A(a) dena lateta aliba onüktem agizüker saka bangdakupur shingaia Naga lima maitsü aser putiotsü senzuka yutsür tashiyim agi sobalibaren mesüra tangatetba tsütsü tetuyuba agütsütsü makok ta NSF-i metetdaksüogo.

Vande Mataram atenba sülen school tenzüksü ta asüba den National Song aser Anthem nungtugu kümdaksütsü

merangba asoshi tebilemstü abener. Shisaliok rejutem ya tashiyim agi inyaksangshi benokdak masü saka angazükdak aser arokaroka shisadangkak südaksütsüla ta parnokisa ashi.

Nagaland nung aliba school tem nung Jana Gana Mana matandang Vande Mataram atemtsü mesüra atemtsü ozüing benokra magizüksü. Nagaland Board of School Education (NBSE)-ia iba dak sendakba tetuyubatem magütsütsü ayongzükür ta NSF-isa metetdaksüogo.

School ketdangpurtemi sendaktepa alirtem den asüngdangya mesüi item tetuyuba mebeshitsü metetdaksür. Iba tetuyuba ya inyakra ibaji Naga kaketshirtem anema ta züngshitsü ta NSF-isa tekümdangtsü shiogo.

NSF-isa parnok federating units aser subordinate bodies ajak dang tenük yoktsü aser pei pei telongtet nung ibala mapa meinyakdaksütsü atema anüksü metetdaksüogo.

## MoS Nimuben Jayantibhai Bambhaniya-i Dimapur semdang



**Dimapur, February 20, 2026 (TYO):** "Prime Minister Narendra Modi lenisüba kübok North Eastern region renloksü atema temulung kanga agütsür" ta Union Minister of State for Consumer Affairs, Food and Public Distribution, Nimuben Jayantibhai Bambhaniya-i ashi.

"Prime Minister lenisüba kübok wadang ajak nung renloka aotsü maparen inyaker aser iba ajanga lanurtem, aluyimertem, tetsürtem aser sensakertem ajangzükür" ta Dimapur kübok Aoyimti yimtsüing nung public sentong

ka nung jembidang MoS Bambhaniya-i ashi.

"New India" yangertsü mangdang kübok North East nung terenlok jenti lia arudar aser sorkari connectivity, welfare delivery aser self-reliance nung temulung agütsür ta laisa ashi.

Tanü Bambhaniya-isa Padum Pukhuri Village, Dimapur nung Fair Price Shop ka semdanga liasü aser idakji Self-Help Groups (SHGs) züngsemtem den ajurutepa sensaksem.

Centre sorkar food security maparen kübok linük nung 80 crore beneficiaries tema angati

jangotsü angur ta lai ashi.

COVID-19 wara mapang nunga Centre-i jangotsü alemba maparen maneni inyak. Iba mapa ya alima nung food security programmes tulutiba rongnung ka lir ta MoS Bambhaniya-isa metetdaksü.

Prime Minister tasoba anogo nungtem nung Gujarat kübok lar Assembly Constituency nung 'Grain ATM' facility ka amenok. Iba facility ya teti lapoker aser beneficiaries-i mashii mapang nung rations agizükteter ta laisa ashi.

(Maneni tapak 8 nung...)

## Manipur CM-i Advisor ana shimoker

**Imphal, February 20, 2026 (Agencies):** Manipur sorkari Chief Minister Yumnam Khemchand atema Advisor inyaksü nisung ana shimogo. Tena ya Oinam Sunil Singh aser Lt Gen (Retd) L Nishikanta Singh na lir.

February 17, 2026 nü Cabinet senden ka nung tena shimtsü mulunga agizük ta Department of Personnel and Administrative Reforms-i metetdaksüogo.

Tena ya küm ka atema

Advisor to the Chief Minister inyaksü shimogo ta parnokisa ashi.

Oinam Sunil Singh ya journalist tejen ka aser taoba State Information Commissioner lir. Pai public affairs aser media administration nung aika ajangshia aruogo.

Külen, Lt Gen (Retd) L Nishikanta Singh ya retired senior Army officer ka lir aser service record tajung yangluteta lir.

## Congress dang nungi Modi-i Assam nem sen teimba agütsü: Amit Shah

**Guwahati, February 20, 2026 (Agencies):** Chief Minister Himanta Biswa Sarma lenisüba kübok Assam ya Northeast nung healthcare hub kümogo ta Union Home Minister Amit Shah-i ashi.

Amit Shah-i Silchar nung lokti sentong ka nung jembidang tesüiba küm ishika Assam kanga renloka aruba indang lemsatop.

Assam nung Rs 27,000 crore alang semiconductor plant ka amenokogo aser iba ajanga northeast nung high-technology manufacturing aser industrial growth alitsü ta Shah-i ashi.

"2004 nungi 2014 tashi Centre nung Congress-i aniba sorkari Assam renloksü atema Rs 1.28 lakh crore lemzüksü. Ajisüaka, Prime Minister Narendra Modi-i tesüiba küm ter

tsüingda Rs 15 lakh crore agütsüogo" ta Amit Shah-isa ashi.

Tarutsü kümtem Assam ya developed states nung züngsemstü ta paisa shisem.

Vibrant Village II programme ajanga arrotsülen aliba tesemtem tashi aittsü aser terenlok alitsü ta Shah-isa ashi.

"Vibrant Village II projects nung Rs 6,900 crore endoktsü aser iba mapatong kübok state 17 nung blocks 334 aser villages 1,954 nung mapa balala inyaksü" ta pai ashi.

"Iba nung Assam nunga districts 9 nung blocks 26 aser villages 140 dena lir. Item yimtsüing 140 nung India nung yimtsüing shia nung aliba ajak alitsü" ta Shah-isa ashi.

## ANATG Core Committee-i lungkak aitba anena atatsü shidanger

**Kohima, February 20, 2026 (TYO):** All Nagaland Ad-hoc Teachers Group (ANATG)-2015 nung Core Committee-i Directorate of School Education (DoSE) ajanga ashiba mulunga agizüker June 30, 2026 tashi lungkak aitba anena atatsü shidangogo saka tatembang lemtet jibo Honibarnü ang agitsü.

Honibarnü tesayurtem lokti senden ka amendang ang tatembang lemtet agitsü ta ANATG-2015 ketdangpurtemi ashi.

DoSE-i Brihostibarnü iba tebilemstü timi aser tashishitsü melii koktettsü atema meranga

inyakdar anungji ad-hoc tesayur 1,166 regularize asütsü asoshi takhangba agüja lungkak aitba anenan ta mepishia liasü.

Principal Director Shashank Pratap Singh-i ANATG-2015 convenor dangi züluba shidi ka nung tesayurtemi benokba khurettem agizüker aser iba ya departmental level nung kanga süoki ia jembidar ta shia liasü.

ANATG onük atema special officer mesüra team ka ajanga ketdangsüa inyaksü. Maneni nungdak adokra ANATG data entry exercises atema volunteers agütsütsü akok ta Principal Director-isa ashi.

Principal Director aser

Commissioner & Secretary, School Education & SCERT nungi shidi anguba sülen Core Committee pur rondak senden ka ayonga amen aser idangji tangatetba tajung nung lungkak aitba khen atema anena atatsü bangjemtep.

Ajisüaka parnokki June 30 tashi dang regularisation maparen inyaksü atema mapang züngzüktsü aser meinyaktetra parnokki maneni lungkak aittsü ta ashi.

Ajisüaka June 30 tashi lungkak aitba anena atatsüba ya züngsem ajungai lemtet ano magi lir ta Core Committee züngsemtemi ashi.

## PIB 'press tour' nung Nagaland nungi nisung 4 liasü

**Mokokchung, 20th February (TYO):** Feb 17 nungi tenzüka anogo asem nü Press Information Bureau (PIB) Government of India teyari nung Nagaland, Manipur, Mizoram aser Arunachal Pradesh nungi osangzülur parnok 13 Assam leni 'press tour' sentong ka atema anir ao.

Iba press tour ya meta penzüa jajaba sentong ka dang masü saka tongtibangsa centre sarkari Northeast state-tem nung mapa balala inyakba aika lir, anungji, itemji osangzülurtemi angazüka media sabang balala nung lemsatetba ajanga nüburttemi item maongkatem agitettsü nükjidong yur ayongba lir.

Anogo asem nü senzüdang parnokki tawa India Prime Minister, Narendra Modi-i 14th February nü lapoktsüba National Data Centre for North-Eastern Region (NDA NER), Northeast Frontier Railway (NFR), rhinoceros noklang tema aliba Pobitora Wildlife Sanctuary, North Eastern Development Finance Corporation Ltd. (NEDFi), North Eastern Handicrafts & Handloom Development Corporation (NEHDC), North Eastern Regional Agricultural Marketing Corporation (NERAMAC), Indian Institute of Technology, Guwahati (IITG) aser National Forensic Sciences University

(NFSU), Guwahati nungertem semdanga liasü.

National Data Centre (NDC) semdangba mapang NDC Guwahati office nung tokolakpur aser Delhi nung aliba Scientist-G & Deputy Director General, National Informatics Centre (NIC) Ashish Vikram dena video conferencing ajanga sensaksema liasü. Iba centre ya sen 348.66 cr. intoka yangluba lir. Guwahati centre ya tawa tanü adokba osettsüset tajungtem inoka yangluba lir, ibai north eastern region nüburttem asoshi temoatsü tuluka lir aser iba ajanga kanga tajangzük angutsü imlar, ta Ashish-i metetdaksü.

(Maneni tapak 8 nung...)

# ABAM-i Ao Oshi Terenlok sentong ayongzüka agi



**Dimapur, Tsüklai/February 20 (TYO):** ABAM Education aser Literature ministry ajanga ayonga Ao Oshi Terenlok sentong Tsüklai 19, 2026 nü Impur nung ABAM Zone 1,3,4,5,6,7 nungi Sannükertem asoshi agia liasü.

Anogo aben kija kibong aser lokti nung yakbangsüa inyakerkem ya Sannükertem ya ka lir. Ao oshi amshiyim, jembishinüyim aser zülumen lirumedema amshiteta inyaksangshi asütsü nükla nung iba sentong ya agiogo, ta Rev. Temsü Jamir, Executive Secretary, ABAM ajanga sangdong ka nung ashi.

Iba sentong nung "Ao Oshioben aser zülumen lirumedem" aser "Ao Oshiji Sobaliba Tamentakdak" ana ya tongtibang onük süa agi. Iba onük nung Wb. I. Temjen Tzüdir, Coordinator Ao Riju, aser

Padma Shri T. Senka Ao, Mokokchung ajanga tangatetba tajung den tangazüktsü tesayuba aika agüja tadenertem tangazükba jenti nguogo.

Dr. Lanurenla, Principal, Saochang College Tuensang ajanga tajungshiba O jembiba mapang nung, asen Ao oshi tesamatsü tia kati arutar, ta ashi.

Chirnurtem aser semchisemurtem nem asenoki sayutsü mapang ta lai shia liasü.

Intergenerational Transmission; Government Policies; Institutional Support aser Organizational Support asüba mapatem nung nüburtemi shilem agitsü ayongzük ali ayongzük aser joko lokti balala ajaki iba mapa asoshi süoki ia jembia inyaksü tang rongdak nüngdak kumogo ta shisem.

Rev. Temsü Jamir, Executive Secretary, ABAM ajanga ayongzükba mapang,

asenok oshi tepsetba tensa mapang ka nung alir, ta ashi.

Koda masüba mapang ajurutsü ana nung lir. Asenoki mission wadang inyakdanga Tsüngrem osang agütsür saka pei oshi wazüka ayutsü aser oshi tongtibang indang aiben mashir, anungji, Tsüngrem O den külemi oshi kümzüka ayutsü jembitsüa kanga tongtibang kümogo, ta ashi.

Joko chirnurtem asoshi senmang kecha maka. Anungji, kibong aser lokti nung joko asen oshi jembia tarutsü putu asoshi senmang yutsütsü nükla ayutsüla, ta pai ayongzük.

Arogo 53 nungi sannükertem ajak agi 58 iba sentong nung aden. Lokti aser kija den wadang balala nung inyakdang, maneni asen oshi meraketa lirumedema jembia aser amshia nüburtem tenzüktsü tamang ayur, ta sangdong ajangasa ashi.

# Nagaland Civil Secretariat staff tem training agitar



**Dimapur, Tsüklai/February 20 (TYO):** Nagaland Civil Secretariat nung supervisors aser sardars tem densema Multi-Tasking Staff (MTS) 720 jungnüa atema anogo toku Capacity Building Training sentong ka February 16, 2026 nü Nagaland Civil Secretariat, Kohima nung tenzüka lir.

Iba sentong ya Home Department indang Secretariat Administration Branch 'B' ajanga training partner Living For Environment (LiFE) den lungjemer ayongzük. LiFE ya NGO lir aser libajen nung timtem magütsüi alitsü ajungmesoba nung bendanga agütsür inyaker.

LiFE-i 2019 küm Secretariat nung waste assessment study agiba mapang ngutetba nung ajemdaker iba training curriculum ya kanga kumdanga yanglu. Parnoki Swachh Office protocols den lokteper Solid Waste Management Rules, 2026 den putepa iba training agütsür.

Secretariat nung kanga nüngdakba support staff tem inyakyim aser yimya tajungba kumdaktsütsü nükjidong nung iba sentong ya ayongzük. Training mapang parnok dang modern sanitation aser jana-ona ketdangsüba yimyatem sayutsü, tang amshiba ozüngtem nung aliba ama jana-ona indokba

yimyatem angazükdaksütsü.

Kasa training nung mürekmejuba oset tem anepalua amshiba, mapa inyakba tesem müreka ayuba indang awajemtsü, office etiquette, workplace discipline aser service standards tem sayutsü. Kasa mapang pei temang mürekmejua aser kumzüka ayutsü atema lenmangtem sayutsü.

Classroom session sülen practical training ya March nung tenzüktsü. Iba mapang LiFE team-i iba training nung shilem agirtemi angatetba asadangtsü aser parnoki training nung angazükba tem amshir asü masü ta reprangtsü.

# Mon nung PM Vishwakarma indang awareness sentong agi

**Dimapur, Tsüklai/February 20 (TYO):** Ministry of MSME, Government of India, MSME Development & Facilitation Office, Dimapur ajanga DIC, Mon district den teka amteper PM Vishwakarma kübok awareness sentong ka February 19, 2026 nü DIC indang Conference Hall, Mon nung ayongzükba liasü.

Technical Session mapang Chief Manager SBI Mon, Robert Zosangliana-i Financial Literacy aser Banking Matters onük nungi jembia aser OM Vishwakarma loan indanga rateta ashi.

Manager SCK (IDAN) Mon, Mopa Talem Konyak N-i Entrepreneurship Development and Marketing Strategies onük nung jembidang, nüburtem dang pei business nung takok angutsü ayongzük aser CaPEX (capita investment) nung masü saka OPEX (Operating Expenses) nung tali rangloktsü ashi.

Paisa Chief Minister's Micro Finance Scheme aser loan indang criteria tongmelang agi rateta shia liasü.

Inspector, Industry DIC Mon, Mansa Walim-i MSME

aser state sorkar kübok scheme balala indang lemsatep aser Project Associate RAMP, M.L. Daniel-i PMV beneficiaries tem UDYAM registration portal nung boarding asüba indang jembia liasü.

Pai aluyimertem dang UDYAM card ya Aadhaar Card ama tongtipang document ka lir aser PM Vishwakarma Loan atema nüngdaker ta metetdaksü.

SPLMU, Lohe Lokajiaa Victoria-i PM Vishwakarma atema QR Code Generation indang rateta ashi aser aluyimertem dang pei mapa akok tashi tekeraba nung tenzüktsü ajungmesoa liasü.

Proprietor Ab's Link and Washmart Mon, Y. Abraham Konyak-i MSME Success Story lemsatapa liasü.

General Manager DIC Mon, Y. Shoyan Konyak-i iba sentong ayongzükba nükjidong lemsatep aser shisalen sayurtem dang pelaba shisem.

Sentong nung Project Associate RAMP, Anne Chopan menden liasü aser Functional Manager DIC Mon.

M. Chingo-i melepzüng o jembia kong aluyimer 101 dena liasü.

# Mokokchung nung DTFI senden amen



**Dimapur, Tsüklai/February 20 (TYO):** District Task Force for Immunization senden ka February 20, 2026 nü Deputy Commissioner, Mokokchung indang Conference Hall nung Ajay Moktan, Assistant Commissioner, Mokokchung lenisüba kübok mena liasü.

Senden nung Dr.M.A.HAZhar, SMO WHO ajanga Vaccine preventable Surveillance & MR elimination indang osang lemsatep aser Routine Immunization aser Zero dose: PZD, MR-1 aser MR-2 nung Mokokchung district inyaksangshiba osang agütsü.

Pai maneni MR elimination atema VPD surveillance

tajungba inyaksü ayongzükba liasü.

District performance indang jembidang Dr Limanaro DPO (UIP & RCH) ajanga district indicators tajungba akumba sayur ta ashi aser züngsem ajunga dang amalitep akatsü aser maneni meranga inyaksü ayongzük.

Missed out aser drop outs malitsü mechi healthcare workers tem maneni kiboksem oa vaccine agitsü nungnanga aliba tsürabor den vaccine indang lemsateper ta ashi.

Iba senden nung Consultant UNICEF, sendaktepa aliba departments, IRCS züngsemtem,

TATTVA Foundation aser CMO staff tem dena liasü.

# Board of Peace senden nung India-a Observer ama aden

**New Delhi, February 20 (Agencies):** US Tir Donald Trump-i tentetba Board of Peace senden nung India-a observer state ka ama aden.

Hopta ka tejaklen Ministry of External Affairs (MEA)-i, US-i India dang iba Board nung adentsü asüngdangbaji sorkari shisadangdar, ta metetdakja liasü.

Board of Peace senden nungji India tenüng nung Washington D.C nung aliba Indian Embassy nung ketdangser Namgya C Khampa aden.

Taoba ita Davos nung World Economic Forum senden aliba mapang nung US Tir Trump-i Board of Peace tenzükja liasü. Iba mapang nungji Trump-i, "Iba Board nung ajaki shilem aginer. Iba ya mapang ka nungbo UN ama tongti sabang ka akümtsü," ta metetdakja liasü.

Mezüngbo iba Board ya Israel aser Gaza nung Hamas

tsüngda rara anendaktsütsü nükkidong nung liasü saka Gaza yanggershitsu aser ketdangsuba reprangtsü atema-a nungloksü.

US ketdangsertemibo, iba Board ya Gaza atema dang masü saka alima nung yimji-yimjung atema-a inyakba tentet ka akümtsüa akok, ta metetdaksüogo.

Brihostibarnü iba Board mezüngbuba sendenji Washington nung aliba United States Institute of Peace nung amen aser iba senden nungji linük 50 jungnüa aden.

Item linük 50 nungjagi linük 27 bo iba Board nung denogo. Tang iba Board nung züngsem linüktemji Azerbaijan, Belarus, Egypt, Hungary, Indonesia, Israel, Jordan, Morocco, Pakistan, Qatar, Saudi Arabia, Turkey, United Arab Emirates, Uzbekistan aser Vietnam densema lir.

Iba Board senden nung observer ama adenba linüktem

rongnung India aser European Union densema liasü. India-i iba Board nung adentsü asü madentsüar memetdaksü, ajisüaka mezüngbuba senden nung India-i observer ama adenbaji ajanga India-ia iba Board nung adentsü melunga aliba temaitsü sayur.

Iba senden nungji Trump-i, züngsem linük 9- Kazakhstan, Azerbaijan, UAE, Morocco, Bahrain, Qatar, Saudi Arabia, Uzbekistan aser Kuwait-i Gaza nem teyari agütsütsü atema dollar sen billion 7 agütsütsü nangzükogo, ta metetdaksü.

Paisa, US-i Board of Peace nem dollar sen billion 10 agütsütsü, ta metetdaksü.

Iba dak alia Morocco, Kazakhstan, Kosovo aser Albania linüktemi sepai meyrjang aika Gaza-i yoktsü nangzükogo aser Egypt o Jordan nati iba mission atema sepaitem nem training agütsütsü ta metetdaksüogo.

# Indian Youth Congress züngsem-temi PM Modi anema longkak ait



New Delhi, February 20, 2026: Hokolbarnü New Delhi nung Indian Youth Congress nung inyakertemi Global AI Impact Summit agiba tesem nung Ato kilonser, Narendra Modi anema yimyim ayima longkak aيتدang tangokba noksa nung angur.

# SC-i Bengal nung SIR atema judicial officers lemezüktsütsü tuyu

**New Delhi, February 20 (Agencies):**

Supreme Court-i alakteta tetuyuba ka agüja Calcutta high court dang, West Bengal nung electoral roll yanglushitsu atema tang tagidak SIR exercise ketdangsuba reprangtsü atema tang teinyakdak mesüra anisüngzükter aliba judicial officer tem Electoral Registration Officers shimmang, ta metetdaksü.

Hokolbarnü Supreme Court-i Calcutta High Court nung Chief Justice dang, SIR exercise dak sendakba nung tashishitsu alibatem dak sendakba nung telemtetba agitsü atema judicial officers shimmang, ta tuyu.

Bengal nung SIR dak sendakba nung state sorkar aser Election Commission na tsüngda aitsüteper aser kati ka dak melung melemtepi aliba mapang nung Supreme Court-i, "Documents shidak ali asü mali ibaji reprangshitsu aser voters list nung züngokba

mesüra züngdokba shidak reprangtsü atema onoki Calcutta High Court nung Chief Justice dang tang teinyakdak judicial officers aser anisüngzükter aliba judicial officers kar shima mapa nungloksütsü atema tuyutsüsa akümer," ta metetdaksü.

Chief Justice of India Surya Kant-i, "Iba mapatong mapang shidak nung tembangtsü atema judicial officer/taoba mapang judicial officer-i agütsüba tetuyuba mesüra obendangji iba court-i tuyuba ama züngshitsu, aser state sorkaria ibaji shidak beshitsu," ta metetdaksü.

February 9 nü ken o angadangba mapang nung Supreme Court-i, documents reprangshia telemtetba agitsü atema EROs/AEROs nem February 14 nungi tenzuka ano hopta ka mapang agütsütsü tuyu, ta metetdakja liasü.

Supreme Court-isa, mapa nungloksü aliba micro-observers mesüra state sorkar

ketdangsertemji EROs/AEROs yarisemtsü atema dang lir, ta metetdaksü.

Supreme Court-isa West Bengal DGP danga, state nung temzüng-ozüng mazüokteter, ta election commission-i tai tongloksü aliba dak sendakba nung nija affidavit ka nung telanzüba agüjang, ta tuyua liasü.

Tamalen Supreme Court nung ken o angadangba mapang nung West Bengal Chief Minister, Mamata Banerjee-i, Election Commission-i Bengal anema inyaker, aser SIR ya Bengal nung nüburtem voters list nungi tenüng agientsü atema lir, ta metetdakja liasü.

Trinamool Congress-i SIR inyakyim nung tim masüba mapatem beshir, ta tai tongloksüba nung ajemdaker January 19 nüa Supreme Court-i SIR inyakyim teladak asütsü atema election commission nem tetuyuba kar agüja liasü.

**New Delhi, February 20 (Agencies):**

Hokolbarnü Indian Youth Congress nung inyakertemi Delhi nung AI Impact Summit agiba tesem nung longkak aita Ato kilonser, Narendra Modi anema yimyim ayimba mapang sepaitemi apu.

AI Summit agiba tesem nung security sepaitemi exhibition hall nung nisung ter apuba sülen Tilak Marg police station-i anir ao.

Police officer kati, "Idangyongjisa parnok pua Tilak Marg police station-i anir ao. Shinga nem-a tensa meraksadaktsütsü," ta metetdaksü.

Longkak aiteremji Hall No 5 telungi aiba sülen Modi anema yimyim ayim. Parnoki

Ato kilonser Modi aser US Tir Donald Trump na noksa ajenloka aliba tola amer "India US shishilembaba tezüngzüktep" aser "Epstein Files" ta yimyim ayima liasü.

Longkak aiterem ket nungji party wako mesüra yimtenren dak sendakba temaitsü kecha maliasü, ajisüaka parnok rongnung kati, 'onok Indian Youth Congress nungi' ta ashi.

AI Impact Summit ya February 16 nü tenzük aser February 20 nü tembangogo.

Iba summit nung linük balala nungi tekolakpurtem, alima tesem balala nungi AI lenirtem, shisashirtem, research agirtem aser technology company tem nungi tekolakpurtem aden.

# Angati agütsüba schemes ya party temi reprangshitsu: SC

**New Delhi, Tsüklai/February 20 (Agencies):**


Tamil Nadu Power Sorkar aser yimtenren party balalai nüburtem nem angati osettsüset balala agütsüba aija Supreme Court-i, osettsüset angati lema agütsüba aser bank account nung indangindanga senotsü inoktsüba ajanga linük yangerba nung timtem adoktsü, ta metetdaksü.

Chief Justice of India, Surya Kant den Justice ana-Joymalya Bagchi aser Vipul M Pancholi nungeri akümba bench-i, osettsüset angati lema agütsüba mesüra account nung sen inoktsüba melenbo state sorkartemi schools, hospital aser training centres tajung yangluba aser mapa adokdaksüba projects nung ang sen indoktsüla, ta

metetdaksü. Tamil Nadu Power Distribution Corporation-i Electricity (Amendment) Act, 2024 kübok Rule 23 dak sendakba nung Supreme Court nem temepishiba ken o ka agüja liasü. Rule 23 kübok discoms atema senotsü dak sendakba telatetba kar lir.

Supreme Court-i iba oshidang agütsüba ajanga Tamil Nadu sorkari agütsüba angati/subsidised power schemes kongshitsu akok.

Chief Justice of India-i, "Iba ya India tesem ajaklen aliba timtem ka lir, iba ya onoki Tamil Nadu dak sendakba kija nung jembir masü. Yimtenren lenirtem aser yimtenren party temi angati agütsüba scheme ya meyipa reprangshitsu nüngdak," ta metetdaksü.



February 20, 2026 nü Karnataka kübok Bagalkote nung mosque ka anasa Hindu aser Muslim nungertem tsüngda raraba tesem nung police adenshia aliba noksa nung angur. Tensa azüoktsü atema Bagalkote nung February 24 tashi curfew ozüng benokogo.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

TSÜKLAI 21, 2026

### Oshi aika metetba lanur

**T**anü ya alima ajunga nung " Oshi aika meteta jembiba nung lanurtem ola " ta asüba omen nung Alima Tetsü Oshi Anogo amonger. Atangji, tanü putu nungbo lanur kati oshi aika metetbaji kecha balaka masü, kechiyong information technology ajanga alima ya yimtsüng ka ama dang kümogo aser iba yimtak alir tanurtem jagi social media balala ajanga kaketrejui maodangyongi oshi anasembabo külemi angazüker. Iba jagi tanü asen lima nunga asen tanurtema, akhi putu nung ama masü, tanü putu nungbo school-i mouka Hindi aser English oshi nabo jungjunga shiadoker. Ajisüaka, oshi aika metetsang lanur jagi pei tetsü oshi mejembiteteter aser mezüluteter. Tanü asen kin aser asen lokti nung tebilemstüji aji lir. Pei tetsü oshi ya o dangbo masü saka oshi dak asen kin kidong aser sobaliba ajak keta lir, anungji kodang asen oshi samadir asen tanela sama amato asütsü, anungji pei tetsü oshi mashi aser memetet ser tangar oshi jembibaji takumbo taküm saka tanela mali temang terep dang arakzür amai lir. Atangji, tanü asüng akhi ama kaket mazünger saka mobile phone aser television screen nung dang repranger aser item nungji asen oshi jembiba aser sayuba otsütem mali. Ano, ibaji dang masü saka kaketreju nunga asen tetsü oshi sayuba school nung asen tanurtem aika mazünger, anungji tanü asüng tanurtem aika pei tetsü oshi angazükdak maka, Aorbo Aor saka Ao mashi, anungji Aor memesük küma aor. Ano tanü lanurtem pei oshi mashi inetbaji, talisa, asenok tsürabur kibong aika nung Ao mejembir, anungji tanurtemi Ao mashibaji kecha tesüngmangtsü mali. Akhidang, asenok azüng zülu meteta class 6, class 10 ajangteter, ano graduate süa zünger government mapai aibaji asenok asoshibo ita petinu atong amai liasü, anungji idangji English jembitetba jagi American nunger akümer amai bilem aser joko pei kidang pei tetsü oshi jembibaji peisasa pei jenjang alur ama bilemba mapang ka liasü. Idangji, asenok aikati pei tetsü oshi mesenmetua amshi aser Aor o Aor na Ao agi jembitsübaji maksü aser tamakok amai bilem. Aji oda, akhidangbo private school dang ya English school ta aja, anungji school nungji English dang jembitsüla aser iba school nungji pei tetsü oshi jembira temerenshi agütsü. Iba amaji, pei lima nung pei oshi jembiba atema temerenshi agüja alinung, tanur shibaibo pei tetsü oshi angazüknütsü aser jembinütsü ? Ajisüaka, tanü asen lokti nung English jembia jembia kecha inyakbo mashi, kar pei tsüraburtem nem mesüdaktsür aser kar meshimetsüa jajar ta pei tsürabur aser school-temi raksatsüba nisung aika lir. Atangji, tanübo item tesüiba mapatem, dakji tan ser, akok tashi asenok ajaki pei tetsü oshi jembitsü meranger. Aji oda, government-ia joko kaketreju nung tanurtem mezüng azüng tenzükdangbo kaketreju ajak nung pei tetsü oshi agi sayutsü ajungshir. Iba jagi asen lima nungbo tanur shiai oshi asem pei tetsü oshi, Hindi aser English oshi angazüktsübaji kaketshisatsü sayuyim nung lateta yuja lir. Tanü alima nung nisungtemi jembiba oshi 7000 shi lir aser item rongnung asen oshi ya dena tang nungi asenok ajaki asentenshia asen oshi jembitezenzükra, iba alima aso 2100 küm ajung tashi nungbo oshi meyirijang ana shibo samar alitsü amai oshi indang bushidanger mongintemi ashir. Koba kin südir süaka oshi ya pei kin aser pei kidong tenüng lir, anungji pei tetsü oshi agi pei kin sanger longjemdaksür aser tangar kin meyi ter rongnung asen kin a jangjar. Ajisüaka, kodang oshi samadir, kin samar. Aji oda, tanübo alima nung oshi samaba agi kin samaba otsü aika lir. Aji oda, tang nungi asenoki temulung agüja asen oshi mejembira, ashiko, taruba alima aso 22 buba nungjibo, Ao kin dak nungi jakzükba nisung maliba agi masü saka Ao oshi samaba agi alima nung Ao kin mali akümstüa akok. Ibaji bilema tanurtem nem tamasa pei tetsü oshi angazükdaktsütsübaji asenok tain aser tsüraburtem shia mapa asütsüla.

# OLEMSABANG

## Akümlir Mongjen

Talitemjen Imchen

*(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem)*

*(Yashi adok nungi...)*

Yakta dang yimti nung alirtem-i Tsüngrem asem tashi bushitet. Ibaji dang masü Tsüngrem balalai kechisa inyaker benteta amang. Parnoki amangba Tsüngremtem: - (1). Lijaba Tsüngrem - Alima nung akümlir den kodanga mepilai lijen dang aliba agi, Lijaba Tsüngrem ta aja. Iba Tsüngrem-i alima nung alirtem, shirnok-i ajak den jungtepa liteter aser külemküja nung tim külemteter moatsür. Saka shirnok-i jungtepa meliteter aser külemküja nung tim mekülemteter merenshir ta amang. Lijaba Tsüngrem ji alima nung teti alir ta amang. (2). Melutsüngba/Longkitsüngba Tsüngrem - Alima ajanger Melu tashi lur aliba agi Melutsüngba Tsüngrem ta aja. Ibaji dang masü, Melu lima nung longki tulutiba nung aliba agi Longkitsüngba Tsüngrem taa aja. Iba Tsüngrem yagi tasür tanelatem o bendanger. Alima nung alidang shirnok-i junga meliteter, Pai teti timtemdak alitsü obendang agütsür aser teti tatem maka timtema alidak airong nung pouka ayur. Saka alima nung alidang shirnoki junga liteter, Pai tepeladak alitsü o bendang agütsür aser longki telongi anioka, teti tatem maka tepeladak lidaktsür ta amang. Melutsüngba Tsüngrem ji alima tatem tashi lur-ang Melu lima alir ta amang. (3). Sobatiaba/Anüngtsüngba/Anüngdangba Tsüngrem: - Iba Tsüngrem-i nisung dang masü taküm shia nem tia aser sempet (luck & gift) agütsür alima-i yuker/asor. Ano kodang nisung ji mesüra taküm ka ji süadokdir, Pai agütsüba tia aser sempet ji tanaben bendener aser paisa ayur ta amang. Iba jagi Pa dang Sobatiaba Tsüngrem ta aja. Nisung mesüra shiruru kar yimya aser tereprangtsü nung kasa salo memesük sotetba aser mapuba ji, Sobatiaba Tsüngrem-i aibelena tia aser sempet inoktsüba ajanga lir ta amang. Sobatiaba Tsüngre ji anüng nung alir aser anüng madak Pa kibur ta bilemer, Anüngtsüngba Tsüngrem taa aja. Alima nung alir tzü nungdak dang Pai tzü moatsür aser tanaben Pai-sa sota ayur. Iba jagi Pa dang Anüngdangba Tsüngrem taa aja. Arasener Oangla-i shirangertem arasendaktsür aneptsüba ji dang masü, saka Tsüngrem den jembite. Yimti nung Arasener Oangla sotetba ji arasener (Doctor) dang masü, lar putu mapang tashitemeteter tulutiba ji la liasü. Tenük agi menguaka, Nisungsangla dang nungi tuluba aika lir ta alima-i amanga arubatem ji, asem masü saka ka dang lir ta lai metet. Lai iba dangji, asür Tiapetzük-i Tetsüng remer among nung yimertem dang sayuba, TSÜNGREM ta tenüng jaloktsü. Iba Tsüngrem jagi akümlir ajak azükoker ta nepurtem dang ashi. Iba sülen yimertem-i lai sayuba nungji Tsüngrem ji aika masü, saka ka dang lir aser aji Tsüngrem ta angajema tamangba yimsü nükrangtong ji melenshir amang. Oangla/Tongsangna-i kodanga kibong maküm, timtemer mekokminer dang temeim sayu. Nepur lanu tain, tulu tila ajak den jungtepa meimtepa ali. La libaliru aser mapa tajung, tanü-a alima-i teti bilemteter aser kija, kibong, lokti ajak nung la atishitepa jembia, la ama alitsü ajungshitepa akümlir wadangtem inyaka alitsü len sayuteper. Arasener Oangla-i asü lima ajuruba otsü nungji medensür, yimertem-i Tiapetzük aser Melusang alep ki ji repranga ata nung, tena alep ki jibo kanga dang tepur junga shizüka ao. Takar süaka shirnoki tangar akhüm metsübui, pei tashi agi alir ama ngasangatema lir asü, item alep ki jibo, shizüka meojungi, aleptong langkoshishia tepur mejungi raksaba ji angu.

Alima nung ajemaluteta, temeim lia kati ka akhümstübutepa alitsüba yabo, taso dang keter asor masü, saka akümlir-i dang azüoka tepur junga liteter aser item nisung ji dang asü limanunga anisüngzüka tepeladak lidaktsür ta yimti nung alirtem-i amang. Saka ano, putu balala melenshia nisung tasen aser arasener tasen soteta, metetloka alima ji aindang, nepurtem-i tsüngrem talila bushiteta külemküja aser amongtsümong timba küma züin.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## EU Parliament-i Turkey nung bendanger Khristantem meindokba aitsü



EU Parliament nung Turkey nung Khristantem meindokba onük nung o lemtepdang tangokba noksa nung angur.

**February 20, 2026:** EU Parliament nung Turkey nung ketdangsertemi bendanger Khristantem aser missionary tem linük nungi meindokba sashia aitsüogo, ajisüaka Turkey ketdangsertemi iba osangji tai ta ashir.

2020 küm nungi tenzüka tang tashi nung Turkey nung bendanger missionary tem densema Khristan 200 dak tali meindokogo, aser ibaji ajanga Protestant Arogo aika nung pastor tem mesüra lenirtem makai kümogo.

Turkey nungi meindokba Khristantem rongnung tesüiba küm aika linük nung lia aruba ordained minister tem-a densema lir.

Linük security nung ajemdaker bendanger Khristantem Turkey telungi maitdaksür mesüra tanaben linük telungi maitdaksür.

Tan ita tetenzüklen European

Court of Human Rights (ECHR)-i iba dak sendakba ken o 20 Turkey sorkar nem metetdakja telangzüba agüjang, ta tuyuogo.

Iba dak alia European Parliament nunga Turkey nung bendanger Khristantem meindokba anema bangzüng ka renema agizükogo.

Linük security tenüng amer inyakyim kecha mebenshii bendanger Khristantem meindoker, ta EU Parliament nung agizükba bangzüng nungji shia lir.

Ajisüaka Turkey foreign ministry-ibo, "Item osangji tai; tiyazü nung tai tongloksüba dang lir. Linük telung inyakyim nung mamoshitsüla," ta metetdaksü.

European Court of Human Rights (ECHR)-i benokba ken o 20 ji ADF International-ia pusemer. ADF International-i, yimjung meimba Khristantem

anema inyaksü atema Turkey-i tim masüba nung kiralongra nokdangba ozüngtem amshir, ta metetdaksü.

ADF International nung Global Religious Freedom Director, Kelsey Zorzi-i, "Turkey sorkari European Parliament vote magizüktetbaji ajanga parnoki meimchir temeden akhüm metsübuba kuli sayur," ta metetdaksü.

"Yimjung meimba missionary tem aser Khristantem anema inyaksü atema linük security amshiba sorkar nem temerenshi magütsü malitsüla," ta pai ashi.

European Parliament nung iba onük nung o lemtepdang mapang nung Croatia MEP Tomislav Sokol-i, "Turkey nung linük security nung ajemdaker Khristantem meindokbaji alima nung reshikangshi tamajungtiba ajangshiba Khristantem anema inyakba kulitem rongnung ka lir," ta metetdakja liasü.

## ANOGO ABEN TSÜNGREM DEN

## Khrista metetba

"Ni nenok den papikati liaka, nai Ni memetet no?"

Yohan 14: 9.

Masterba tasüngdangba nungji temulung amsaa liasü ta angateter. Item nütsüngtem Pa den küm asem tashi liasü. Pai Pa tobur ajungba aser anükalemba ngua liasü. Pai Pa mapa küli süa liasü. Iba mapang tashi nungbo, nütsüng jagi Yisuji meteter alitsü tim liasü. Yisui Pai Pa memetet ta ashir. Lesson-Khrista den mapang talang ka lia arur alitsü akok, aser pa indang junga meteter alitsü akok, saka shitakba nung Pa memeteti dang arur alitsü akok. Philipi Yisuji nisung ka, sayatenya mapa inyaker, jakla tajung atenba nisung ka ta meteta liasü; saka kodanga Pa angatettsü asoshi ibaji atena lua meshisadang. Tobur jungkai adoktsür ka ta Pai pa memeteti liasü. Iba temoatsüba taküm nungi aruba tesangwa pai kodanga Tsüngrem sentsüwangshi mangu. Yisuji nisung ka ama dang metetbaji pa kodanga memetetba den sakü. Asen tebilemba nung Khrista matenba tetezü Khrista keni dang maka.

Khrista asoba nungi Olive tenem nungi Kotaki atuba indang asenoki junga meteta alitsü akok aji saka Paji kija kümtetdakba, asenok temenen nungi kümzüksang aser asen nüngdak ajak nung teyarir tabo memeteti alitsü akok. Asen temetetba jagi Khristaji Kümtetdakba, Kibur aser Tembar ta metetba leni manira kecha tajung meinyaksü. Meyiper anemsü Khristan akümtsü koba Tsüngrem tsüngdang tesempatsü lir. Anogo shia Pa temeim aser anepaluba asen meküta alir saka asenoki aji memeteter.

## 2025 küm Iran linük nung Khristan 250 dak tali apu

**February 20, 2026:** 2025 küm Iran nung ketdangsertemi Khristan 254 puogo, aser ibaji 2024 küm apuba den medemdangra anasü agi teimba lir.

2024 küm nunga Khristan 139 pua liasü.

Item ken o shilem 90 bo Arrla 500 nung ajemdaker apuba lir, ta February 19 nü Khristan melungtet teloktem-Article18, Open Doors, Christian Solidarity Worldwide aser Middle East Concern külem report ka ajanga metetdaksü.

"2025 küm tatembanglen tashi nung Khristan 43 tepuokdak liasü aser Khristan 16 ken o mangadangi tepuokdak liasü," ta report nung shia lir.

"2024 küm Khristantem anema obendang 96 agüja liasü, aser iba denji medemdangra 2025 küm nungbo Khristantem anema obendang agütsüba 73 dang liasü. Ajisüaka tepuokdak ayutsü kümsükbo 2024 küm (263) dang nungi 2025 küm

(280) teimba liasü, aser ibaji ajanga temerenshi obendang tesashiba agütsüba kuli sayur," ta report nung shia lir.

Yaküm Khristan 11 bo küm 10 dak tali tepuokdak ayutsü obendang agütsü.

Yaküm June 13 nungi June 25 tashi Iran aser Israel na tsüngda raraba sülen Iran nung itdangitba ozüng kübok Khristan pongu aitsü aser parnok ajak senteper küm 40 tepuokdak ayutsü obendang agüja liasü.

Iran aser Israel na raraba sülen Khristantem apuba kanga bulua aküm. Iran Ministry of Intelligence-i sangdong ka ajanga, 'training agia alirtem' (evangelical Khristan) 53 puogo, ta metetdakja liasü.

"Kerdangsertemi Laishiba aser Khristan kaketttem densema Khristantem kiojen pua ayutsü tetuyuba agüja liasü, aser ibaji MOIS [Ministry of Intelligence and Security] research agitsü atema liasü," ta report nung shia lir.

Ano tatalokba ka nung,

army officer kati Khristan yimsü agizükba sülen pa mapa nungi anendaksü aser Islam yimsü toktsür Khristan yimsü agizüker Khristan pongu tanaben Islam yimsü dangi meyipdaksütsü atema 'cult treatment clinics' nung ayutsü court-i tuyu.

Tepuokdak alir Khristantem nem medical teyari magütsür aser reshikangshir.

"Ano taoksatsü osang kaji, International Women's Day anogomong nung mashisa Khristan ka küm 16 tepuokdak ayutsü obendang agüja liasü," ta report nung shia lir.

"Tepuokdak alir Iranian-Armenian Khristan ka küm 10 tepuokdak ayutsü obendang agütsü aser tetsü asüpila sentong nung adentsü atema-a temelaba magütsü. Islam yimsü toktsür Khristan yimsü agizüker ka tepuokdak 'stroke' asü aser Khristan ka tepuokdak azüklen aliba yipten nungi tsüka tongtoret sükdang," ta report nung shia lir.

2025 küm nunga Iran nung

ketdangsertemi Laishiba ayokba/alemba nokdanga liasü aser iba dak sendakba nung Khristan 21 tepuokdak ayu.

"Onoki Iran nung Bible Society tanaben tenzüknir. 1990 küm Iran nung khenpiga atema Bible Society anenja liasü saka tesüba küm 35 tashi tenzüksü memelar. Iran nung Bible Society asentenshir tenzükra Khristantemi bendanglen nungi Laishiba bener arutsü menüngdaksü," ta report nung shia lir.

"Onoki alima nung aliba linüktem dang ICCPR kübok Arrla 18 nung aliba ama meinyakba atema Iran anema inyaksü mepishir," ta parnoki metetdaksü.

Yaküm-a Iran nung Khristantem anema tesempa o jembiba tatalokba aika liasü.

Islamic Revolutionary Guard Corps-i Khristantem aiki apu aser Iran nung Khristantemi bendanglen inyaksangshibaji sepaitemi mita repranger.

"Yimsü dak sendakba nung

pua aliba Khristantem aser minorities ajak telatetba kecha makai chioktsüla. Kangshia shibangdaksüba Tenla kitem tanaben lapokdaksütsüla aser Persian oshi jembiba Khristantem nem pei tetsü oshi nung sademsadema tekülem agidaksütsüla," ta Khristan melungtet teloktemisa takhangba agütsü.

"Scapegoats: Rights Violations Against Christians in Iran" ta ajaba report nungjisa 2025 küm tatembanglen Iran nung nüburtemi Islamic Republic lenirtem anema longkak aitba indang shia lir.

"Longkak aiteritem anema tashiyim amshibaji taoksatsüka lir. Khristantem densema nisung meyrjang aika süogo. Tang tesüsa 2025 küm Khristantem temeden anema inyakba osang onoki sangdonger. Tashiyim amshiba lenirtem masü saka nüburttem atema nokdakba lenirtem Iran nüburttemi aginer, aser onokia ibaji" ta parnokisa metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Tzüisen**

(v) tzü nung rema chigoba (bathe, baptize)  
\* Taküm küm ozü arogo nung lanur 16 tzüisen.

**Tzüishi**

(n) au ala agi tzü taa abentsü yangluba oset (bamboo container for carrying water)  
\* Akhidangbo tokolak nung tzüishi bener tzüpui tzütaisa ao.

**OLONG PAITEP # 7421**

1		2		3		4		5	
		6							
						7			
				8					
9			10						
		11						12	
		13						14	15
16						17			
				18					
19									

**TIPILEN**

- 4. Tsük asendak - (5)
- 6. Sen yong agütsü - (4)
- 7. Temechi / Lanu adokba - (4)
- 9. Asadangba - (4)
- 11. Ki anasa - (7)
- 14. Tebang nung enok - (4)
- 16. Apuani na senshi - (4)
- 18. Ozü tulu ka - (4)
- 19. Pei meyong kümnü - (5)

**LANGTSÜNGLEN**

- 1. Tai metet - (5)
- 2. Süoshi magi - (6)
- 3. Chi den mezür chiyongba - (3)
- 5. Kibong telung nung - (5)
- 7. Tenük-telen mejungi aküm - (5)
- 8. Süngjang tachitsü yarir - (5)
- 10. Lepshi - (5)
- 12. Anü adoklen - (6)
- 13. Zülüjang - (5)
- 15. Süng temerem ka - (5)
- 17. A \_ \_ \_ g - (3)

**OLONG PAITEP # 7420 TELANGZÜBA**

**TIPILEN :**

- 1. Lemsa, 3. Osang, 5. Mezüng,
- 6. Agi, 7. Süra, 8. Tebutem,
- 9. Amen, 12. Odi, 13. Asayar,
- 14. Angsü, 15. Agima.

**LANGTSÜNGLEN :**

- 1. Lamem, 2. Sangken, 3. Omen,
- 4. Asüküm, 7. Sendong, 8. Tejang,
- 10. Tanga, 11. Tazü.

**NAI-A YA METETTER MA**



India AI Impact Summit 2026 nung kaketshirtemi tezüngzüktep teimtiba agiba atema Guinness World Records nung zülüokogo. Kaketshirtemi ghonda 24 tsüngda AI tebilemba keta amshitsü tenangzüka agiba ajanga iba otsü ya yangluteta liasü. Iba summit nung 5,000 pledges alizüng yua liasü saka ghonda 24 tsüngda kaketshirtemi 2,50,946 pledges agia liasü aser ibaji "Most pledges received for an AI responsibility campaign in 24 hours" lir ta Guinness World Records Adjudicator Pravin Patel-i kuli agütsü.

**Mizoram sorkari arogo nem de-addiction centre agütsür**



**Aizawl, February 20, 2026 (Agencies):** Mizoram sorkari Kolasib district nung Jordan Centre ta ser de-addiction facility ka Presbyterian Church ket nung agütsüsü.

Iba osang ya Social Welfare Minister Lalrinpui-i state Assembly nung metetdaksü. Synod den iba atema agreement ka nung sign sütepogo. Iba ya Presbyterian Church nung executive body tematiba lir aser kobi melii formal transfer asütsü ta Minister Lalrinpui-i ashi.

"Sorkari Jordan Centre bendanga agütsüsü renemogo aser Synod nungi telangzüba atar. Synod-i iba mapatong atema

parnok budget nung Rs 2 crore lezmzütsüogo" ta laisa ashi.

Law and Judicial Department-i maparen ajak renemogo aser tang Finance Department ajanga reprangdangdar ta Minister Lalrinpui-i ashi.

Sorkari drug abuse anema rarayonga arur aser Aizawl anasa Lunglen nung large-scale rehabilitation centre ka amenoktsü sentong lir. Iba facility ya ajaki meteta aliba Mizo sayutsüingir Fedrick aser par teloki anepalutsü ta laisa metetdaksü.

"Lunglen facility ya alimai meteta yanglutsü aser iba nung amungertem aftercare services aser professional skill

development maparen inyaksü" ta Minister Lalrinpui-i ashi.

Mizoram nung tang de-addiction aser rehabilitation centres 50 tema lir ta laisa osang lemsatsep.

State sorkari urban hospitals nungi pei pei tasoyimi mang 1,888 tashi bener aoba nung yaritepogo aser iba nung Rs 1.97 crore endok ta Lalrinpui-i ashi.

Zoram People's Movement (ZPM)-i election nüboyimba mapang mozüki dang yimtsüngtemi tasümg bener aoba nung state senpong nungi yaritsü ta nangzüka liasü. Tesüba nung iba asoshi MLA temi sen endoka liasü.

**Indian Army-i Indo-Myanmar arrtsü nung corridor ka lapokogo**

**Imphal, February 20, 2026 (Agencies):** Indian Army nung Spear Corps-i Manipur nung Indo-Myanmar arrtsülen kilometre 2.6 tashi merüktetogo.

Arem min tulu nung sepaitemi improvised explosive devices (IEDs) 9 aser unexploded ordnances 2 raksatsü ta defence kettangsur kati ashi.

Arrtsü atsüdangba maparen anendaka aliba tenzüka aotsü

atema Red Shield Division-i iba sanitisation drive inyaka liasü.

Iba tesem nung telungpurtemi yutsüba IEDs aser unexploded ordnance lir ta osang kar angazükba sülen parnoki iba mapa inyaksü tenzüka liasü.

January 16 aser 17 anogotem Yangoubung kübok Indo-Myanmar arrtsülen operation agia liasü. Iba mapang sepaitemi arem min tulu nung 2.6

kilometres (length) aser 13 metres (width) corridor ka lapokteta liasü.

Iba mapang parnoki IEDs 9 aser unexploded ordnances 2 tashi nguteta raksaa endok.

Iba corridor lapokba ajanga survey teams aser construction agencies-i nüngdakba border infrastructure inyaka otettsü ta Indian Army kettangsurtemi ashi.

**Arunachal Police-i luxury vehicles 16 ngutet; 1 apu**



**Itanagar, February 20, 2026 (Agencies):** Arunachal police-i luxury vehicles 16 ngutetogo aser iba dak sendakba nung Guwahati nung nisung ka puogo.

Iba ajanga Arunachal police-i inter-state vehicle fraud ka maddokogo aser arishi küm 38 tain nisung yagi bank kettangsur ta shia gari alirtem ashioktsü.

Iba nisung ya Rupjyoti Das ta jangjaogo aser Naharlagun Police Station nung pa anema ken o aika benoka lir. Pa ya tang police ket nung lir aser maneni

bushisüngdang südar.

Police-i ngutetba garitem nung Toyota Fortuner, Mahindra Scorpio, XUV300, Kia Seltos, Hyundai Creta, Maruti Brezza, Jimny aser Bolero dena lir. Taküm tetenzüklen ashioktsüba ken o tem benokba sülen bushisüngdanga arudang garitem nguteta liasü.

Rupjyoti Das-i nija bank ka nung tongti kettangsur ka ta ashi aser garitem ya chichiba bank e-auction units lir ta nisungtem ashiokja yokdok.

Pai garitemji Assam nungi taa

agüja hire asü aser pai kibur nem temlung lemdaksütsü atema ita ishika sen agüja aru. Iba sülen pai Arunachal Pradesh nung gari alirtem dang kulikakettem yaser agütsüsü ta nangzüker yokdok.

Iba inyakyim amshia pai gari 40 tema yokdoker asütsü akok ta bushitetogo. Assam kübok police station aika nung iba dak sendakba ken o tem benoka lir.

Arunachal police-i ngutetba garitemji Assam Police mesüra chichiba kiburtem ket nung agütsüogo.

# Anogo ter tsüngta alimai Iran tia metettsü: Donald Trump



**Washington, Tsüklai/February 20 (Agencies):** US-i Iran den tezüngzüktep ka yanglutsü asü mesüra mitkar agitsüar anogo ter tsüngta alimai metettsü, ta US Tir Donald Trump-i ashir.

Washington DC nung pai tentetba Board of Peace senden mezüngbuba amendang Trump-i Islamic Republic den par nuclear sentong indang jembishinü akaba lemsatepa, "Asenoki tezüngzüktep tajung ka yanglutsüla, aji mesüra langka tamajung ataloktsü," ta ashi.

Tawa US-i Middle East nung par mitkar tashi ulushiba mapang lir, aser kasa mapang Switzerland nung America aser Iran nunger tsüngta jembishinüba nung terenlok aliba osanga lir.

Iran sorkari UN Secretary-General dang US-i Iran anema mitkar tashi amshira region nung parnok aliba tesemtem nung tenük yoktsü ta shiogo.

Tehran indang UN mission ajanga UN Secretary-General António Guterres dangi shiti ka züluba nung, Trump-i o jembiba nung amaktsü ama angateter saka Iran-i rara maginer, ta shia liasü.

Democratic telok nungi ozüng yanglurtem aser Republicans kari congress nung temelaba magi Iran anema mitkar mera magitsüla ta ashir.

Special Envoy Steve Witkoff aser par tapang Jared Kushner nati Iran den senden tajung kar menogo, ta Trump-i ashi.

Anogo ka tejakdang White House press secretary Karoline Leavitt-i, Iran-i kanga shisa kaa US den tezüngzüktep ka

yanglutsüla, ta ashi aser Tehran indang nuclear sentong nung tangatetep kati arutsü tang tashi Trump teimla lir ta shia liasü.

Trump-i Board of Peace mezüng sangdongba mapang iba ya Gaza nung Israel aser Hamas tsüngta küm ana raraba tatem kati aruba nung yaritsü aser Gaza yangershiba ketdang asütsü nükjidadong nung lir ta bilema liasü.

Ajisüaka taoba ita iba mission ya rara ka kisüng atema masü ama ajitet, aser aikati Trump mendenpuba sür aliba board ya United Nations senzüka yutsütsü asoshi asü ta bilemer, kong linük 20 dak tema lir.

Taoba küm June ita US missile aser aircraft ajanga Iran nunger nuclear facilities asem amak aser ano White House-i tan hopta ano amaktsü jembir ta angazüker.

Hopta ishika American sepaitemregion nung adenshiba mapang lir, aser USS Abraham Lincoln aircraft carrier densema yoka lir.

Ajisüaka British sorkari US dang UK military bases amshia Iran amaktsü temelaba magütsü ta angazüker.

Taoba mapang Middle East nung military operations agidang, US-i Gloucestershire nung RAF Fairford aser Indian Ocean nung UK overseas territory of Diego Garcia amshia liasü.

Satellite noksa tem nunga Iran-i military facilities akangshiba sayuogo, aser par linük indang Supreme Leader Ayatollah Ali Khamenei-i social media nung US sepaitem

amokmerena arur.

"US-i Iran tsütsüi warship ka yokogo ta US tiri tanen makai ashir. Atangji nung warship ya lendong tulu aliba mitkar oset ka lir," ta Khamenei-i post ka nung ashi.

"Ajisüaka warship dang lendong tulutiba nok-nü lir, koba agi iba warship ya tzüyim telungi yoktetsü."

US Congress züngsem aikati Iran anema mitkar temi inyaksangshitsü memulungba lemsatepogo.

California Democrat Ro Khanna aser Kentucky Republican Thomas Massie nati 1973 War Powers Act nung ajemdaker iba ken o nung vote agiteptsü merangtsü ta ashir.

US rarai aotsü tir dak tashi aliba repsangshitsü iba act yagi Congress nem tashi agütsür.

"Iran den raranungbo tesama tulu alitsü. Iran ya nisung million 90 aliba linük, kong air defences aser military tashi tulu lir," ta Khanna-i social media nung ashi.

Region nung aliba US sepaimeyirijang aika meyiper timtem ajurutsü akok, ta pai ashi.

Iba onük Congress indang chamber anaprong ajangtsü teimla kangabo mali.

January ita nunga Senate Republicans temi iba mesük rara indang tashi pangzük ka nokdanga liasü, koba Nicolas Maduro apuba sülen Venezuela nung ano military operations tenzüktsü atema Trump administration-i congress nungi temelaba nüngdaka liasü.

# Amnesty law agizükba sülen Venezuelan opposition lenir chiok

**Caracas, Tsüklai/February 20 (Agencies):** Venezuelan opposition politician Juan Pablo Guanipa-i social media nung, tim masüba yimya amshia tepuokdak ita toku jungnüa lir chiokogo, ta ashi.

National Assembly-i agizükba amnesty bill ka nung linük indang interim President Delcy Rodríguez-i meyongnem agütsür mapang tatsüka tsüngta pai iba o ya shia liasü. Iba amnesty bill ajanga political prisoners noklang aika chioktsü.

Rodríguez'er interim government dang US-i Venezuela nung anünga aliba political prisoners chiokba maparen tekeraba nung inyaktü ajungshia arur.

Ajisüaka Guanipa-i iba bill ya aibelen aliba document ka lir aser iba yongji Venezuela nunger aika tim mesüi tepuokdak yua lir ta ashi.

Guanipa ya Venezuela indang centre-right Justice First party lenir ka lir aser taoba mapang National Assembly nung tatong tir ka liasü.

Venezuela nung 2024 election result anema nokdakba mechi pai kiralongra mapa inyaka linük ashioktsü ta tai tongloktsüba sülen pa jenshia senzü aser security forces temi May 2025 nung apu.

Guanipa ya ita tetenzüklen tepuokdak nungi chioka liasü, saka ano tanaben pua pa chiokba ozüng nung aibelen ta tai tonglokja house arrest nung ayu.

US sepaitemi January 3 nü Venezuela Tir Nicolas Maduro apuba sülen political prisoners noklang aika chiokba rongnung Guanipa ya dena lir.

Venezuela indang socialist government-i political prisoners yua mali ta teti jembia aru, saka Maduro apuba sülen January 8 nü yimya tajung sayua tepuokdak alir aika chioktsü ta sangdonga liasü.

Maduro kübok sorkari par anemer ajemreptsü aser ola madokdaksütsü mechi political prisoners apuba mapa küm aika inyaka aru ta opposition aser human rights telok temi shia liasü.

Interim President Rodríguez-i iba amnesty bill ya tatok meshitsü aser agizüktsü tebilemba nung lir ta ashi.

Ajisüaka South American linük nung aliba activists temi amnesty law menur agizük aser nisung chiokba maparen nung ochishia inyakba mali ta aitsür.

Guanipa ya bendang lima nung jenoka aliba Venezuela opposition lenir Maria Corina Machado den tembar tajung lir, shiba taoba küm Nobel Peace Prize ngua liasü.

Machado-i taoba ita la indang Nobel Peace Prize ya US Tir Donald Trump nem agütsüba sülen mapang tetemsü aruba mapang linük anitsü nangzük. Lai Trump nem iba sempet agütsüba ya pai Venezuela nüchiso asoshi inyakba temaitsü lir ta ashi.



Cairo, Feb. 20 : Egypt nung Cairo northeast tsütsü Port Said province nung truck ana tsüktepba tesem nung tangokba noksa ka yangi angur. Brehostibarnü iba lendong atalokba nung nisung 18 asü aser asem yiru ta ashir. Dakahlia province nungi Port Said nung fish farm nung inyakerkem bener aoba pickup truck ka aser transport truck tuluka tsüktepa iba lendong ya ataloka liasü.

# Imran Khan-i "political deals' ana magizük: Rana Sanaullah

**Islamabad, Tsüklai/February 20 (Agencies):** Pakistan Ato Kilonser Shehbaz Sharif den tesendaktep kanga tajung alir kati ashiba agi, taoba mapang ato kilonser inyaka alisang Imran Khan nem tang mangatetep aliba tembangtsü atema "political deal" yanglutsü maongka anaben agütsü saka pai memulung.

Adviser to the Pakistani Prime Minister on Political Affairs Rana Sanaullah-i Bodhbarnü television talk show ka nung jembidang, Pakistan Tehreek-i-Insaf (PTI) tentetsang den tangatetep kati arutsü anabem merang saka tamakok ajuru, ta ashi.

Sanaullah-i ashiba agi, mezüngbuba nung Pakistan Federal Interior Minister Mohsin Naqvi aser iba mapang Khyber Pakhtunkhwa Chief Minister inyaka alisang Ali Amin Gandapur nati anir November 26, 2024 matongdang merangdanga liasü.

Tanaben ya tawa bendanglen alir nisung kari merangdang. Khan-i mezüngbo mulunga liasü saka mapang tatsüka lir magizük, ta pai ashi. "Iba tebilemtsü nung onoki



Rana Sanaullah

political solution ka aginer, saka Khang-i lenmang bushitsü memulunger," ta pai ashi. Khan-i tang aliba sorkar anena pa yimsüsüba mendeni aruner, ta Sanaullah-i tai tongloktsü.

Taoba mapang asemen tashi ato kilonser inyaka alisang Nawaz Sharif bhukuma jembidang, pa ya tajangshiba jenti aliba yimten yimsüsür ka lir aser tensa majungba mapang pa aser par party tejakleni anitsü pai lenmang bushiteta liasü, ta Sanaullah-i ashi.

Ajisüaka Pakistan Information Minister Attaullah Tarar-ibo Khan den tezüngzüktep kecha yanglutsü memerang mesüra taoshi kecha mesayu ta ashir. Khan ya mapang tamajung inyaker nisung ka ta tejangja kuli agüja

lir aser taoshi sayuba otsü ya tiazü lir, ta pai X nung ashi.

"Imran Khan nem deal mesüra taoshi kecha mesayu. Sorkari Imran Khan dang taoshi sayuba otsü ya ajunga tiazü lir. Imran Khan ya mapa tamajung inyaker ta tejangja kuli nguteta aija lir," ta Tarar-i zülu.

Kasa mapang Khan'er kinunger aser party-i pa Shifa Hospital, Islamabad nung temang repringdaksütsü ajungshir. Pa indang okatsür Salman Safdar-i Supreme Court dang, arishi küm 73 tain Khan ya tepuokdak alidang pa tenük achichilen agi anguba shilem 85 samaogo, ta ashi.

Cricket asaya lir yimten yimsüsür akumsang ka ken o balala nung aija August 2023 nungi tepuokdak yua lir.

### Dr. T. Ao Tournament nungtem nung telongjem senden ka amen



Mokokchung DC conference hall nung Dr. T. Ao Tournament nungtem nung senden mener kelen Mokokchung DC den NFA, MDFA aser organising committee pur külemi tangokba noksa.

**Mokokchung, Tsüklai/ February 20 (TYO) :** Dr. T. Ao Tournament asaya tenzüker küm züing 25 ajungba Mokokchung nung asayatsü ayongzüka lir. Iba asayamong nungtem nung tanü organizing committee, Nagaland Football

Association aser Mokokchung district Football Association nung ketdangsürtem mezüingbuba senden ka Mokokchung Deputy Commissioner Conference Hall nung mena iba tournament dak sentakba

mapatongtem lemsatapa menogo. Kasa anogosa NFA ketdangsürtemi Dr. T. Ao tasoyim Changki tonga oagi Changki Village Council ajurua senden tajung ka menogo ta MDFA sangdong ka nung metetdaksü.

### STATE OSANG : Tapak 1 nungi...

#### MoS Nimuben Jayantibhai Bambhaniya-i...

ATMs ya sen agizükba den sendaktepa lir saka Grain ATM ajanga nübertemi ration items 24/7 nung agizükteter. Union Home Minister Amit Shah-ia par constituency nung iba mesükba facility ka tenzüksüogo ta laisa shisem. 'One Nation, One Ration Card' maparen kübok pei lima toktsür aayangi senzürtemi

linük kübok tesem mashii ka nung jangotsü agizüktettsü aser iba ajanga portability alir aser linük ajungalen food security tashi aiter ta MoS Bambhaniya-isa ashi. India nung AI Summit 2026 amungba atema olen ka ashidang alima tesem balala nungi nisungtem iba sentong nung shilem agitsü atema Bharat Mandapam nung

adenshi ta laisa ashi. Nagaland tobur kanga tajung aser sobaliba senmang kanga takar lir aser iba asoshi tenüngsang agütsür. Centre sorkari North Eastern state tem tejakleni anir aotsü aser ajungkettsü atema tenangzükba lir ta Minister of State for Consumer Affairs, Food & Public Distribution, GoI-isa nenshia ashi.

#### PIB 'press tour' nung Nagaland nungi nisung...



Northeast Frontier Region (NFR) ketdangsür kar den sensaksem dang, tenem lima tupoka tunnel yanglur asünung Dimapur - Dhansiri - Sukhobi - Kohima (Zubza) project ya mapabo tasak saka ibai tenzüker asünung, ibai 2029 tashi nungbo tembangsü, ta iba osangbeneri asüingdangba ka langzüdang ashi. Dimapur railway station tuluba küma yanglutsü mapatong nung tetsükdaksü kar ali asü? ta asüingdangdang, "mapa tenzükerji maneni inyakyonga aotsü, saka tensa tia (law & order) azüoktsübajibo state sarkar tebilemsü lir", ta pai ashi. Tuli railway station asendenshitsu kecha sentong lir mali? ta asüingdangdang, "tang-tang yanglutsübo sanction süa mali", ta paisa langzü.

project kar lemsatap. Item rongnung jenjang talang aser ajaklen bener senzütettsüa magnetic resonance imaging (MRI) kol teyangludak ka sayu, iba den ano robot ajanga operation/surgery agitettsü kol ka yangluba sayu, drone camera project tasen indang lemsatap. Iba den Govt. of Assam aser IIT Guwahati na külem sür Assam Advanced Healthcare Innovation (AGIHF) ta sür crore 546 jenjang mozüiki tuluka yanglutsü maparen tenzüokgo aser ibaji Dec 2027 nung renemtsü, iba den ano information technology tsütsü maparen balala inyakba kar lemsatap.

meiloni parnok campus renemer yangji belentsü. Iba university nung Degree den Diploma aser training course balala agütsür. Ketdangsürtemi region nung forensic maparen balala inyakba lemsatap. Forensic Science ya kanga dang ngujem aliba luyim ka lir, anungji, lanurtemi jangra azüingsüla, ta yangji inyaker ketdangsür ka den jembidang pai ajungshia liasü.

IIT, Guwahati semdangba mapang, Prof. Pradip Kr. Das-ia iba riju tenzüker den department balala aliba aser tawa tanü parnok riju nung teinyakdak

Pobitora Wildlife Sanctuary ya India nung nungtugu rongnung ka lir, yangi Rhinoceros dang masü shiruru tapu aika den ozü tapu 375 dak tali angutsü. National Forensic Sciences University, Guwahati ya khen atema Guwahati Medical College nung amendaka lir saka

Additional Director General, North East Zone, Ministry of Information and Broadcasting, Kripa Shankar Yadav-ia anir Guwahati office nungi par külem ketdangsürtemi osangzülurtem anendak Rohika AAU International Guest House, Guwahati-ia arua metetpela asüba den sensaksem tajung ka liasü. Press tour aor rongnung Nagaland nungi pezü, Manipur nungi asem, Arunachal Pradesh nungi asem, Mizoram nungi asem liasü.

### June ita Brazil aser Egypt World Cup warmup friendly asayatsü

**Rio de Janeiro, Tsüklai/ February 20 (Agencies):** FIFA World Cup 2026 tenzüksü hopta ka lia June ita Brazil aser Egypt na friendly ka asayatsü aser team anaprong iba asayamong asoshi renemshor, ta Brazilian Football Confederation (CBF) ajanga ashi.

anguba team ta züingshir, aser parnoki FIFA World Cups nung asemen shilemagia lir aser 1934 küm Italy nung Africa aser Middle East nungi mezüing shilem agiba team lir.

United States, Mexico aser Canada nung FIFA World Cup 2026 asayamong tenzüksü anogo pongu lia iba asaya ya Huntington Bank Field, Cleveland nung June 6 nü asayatsü. Brazil ya pre-World Cup warmup par linük nung tatembangba hopta ka jelia Panama den Maracana Stadium nung May 31 nü asayatsü.

Egypt ya taküm FIFA World Cup nung Group G nung lir aser parnoki June 15 nü Belgium den asayatsü, June 21 nü New Zealand aser June 26 nü Iran den asayatsü. North African team ya African continent aser Arab lima nung tashi tulutiba rongnung ka ta züingshiba jenjang mesemshitsu tebilemba lir.

Ponguben world champion bena aliba Brazil ya Group C nung Morocco den June 13 nü asayatsü aser June 19 nü Haiti aser June 24 nü Scotland den asayatsü lir.

Parnoki asayar mongin Mohamed Salah lenisüba aser sempet nung tamang akar aser squad nungya Omar Marmoush, Mahmoud Trézéguet, aser Mostafa Mohamed nung ama asayar tejen aser lanurtem meyoaktepa lir.

Terenemshiba mapang tembanga Brazilian national team ya African team tejentiba aser continent nung tajungtiba den asayatsü.

1960 nungi tang tashinung Brazil aser Egypt tsüingta trokben asayaogo aser asaya ajak Brazil-ia koka lir. Tongtipangtibaji June 15, 2009 liasü, aser iba küm Bloemfontein, South Africa nung Confederations Cup asaya liasü.

Iba asayamong shia shilem agiba national teamji Brazil ya lir, shiri FIFA World Cup puti otsü nung takok timtiba ngua lir (1958, 1962, 1970, 1994 aser 2002).

Iba asaya Brazil nung 4-3 agi akok, kong Kaka-ia goal ana aser Luis Fabiano aser Juan natia goal ka-ka agüja liasü. Tanüingba asaya ya friendlies liasü aser tesüsa 2011 nung asaya.

Africa Cup of Nations nung Egypt ya takok timtiba (tenetben)

### Kezhaselu-o Pienyü-i 54 buba ASA wrestling title maneni aben

**Kohima, Tsüklai/February 20 (TYO):** Hokulbarnü Kezhaselu-o Pienyü-i Angami Sports Association (ASA) indang 54 buba Senior aser 1 buba Under-15 Wrestling Meet nung takok korang soita yutetogo, koba Khuochiezie, Kohima Local Ground nung agia liasü.

Organisation (WAYO) nungi Seyiejalie Gwirie nem best tactician senpet sen 15,000 agüja liasü.

Kohima village nungi arishi küm 27 tain melangteper Pienyü ya Northern Angami Sports Association (NASA) tenüing nungi shilem agi aser iba tetoktepa nung pa akoker shinga mali. Pa nem Tepuleho Pusa-ia Chümoukedima nung ali kimong tasazük 10,000 sq ft ka agütsü aser senpet sen 2.6 lakh ngua liasü.

Under-15 category nung NASA nungi Menuokhriezo Metha-ia champion title nguteta senpet sen 30,000 agütsü aser kasa NASA nungisa Vimethazo Chale-ia tanabuba jenjang tonteta senpet sen 20,000 agüja liasü.

Phesama nungi arishi küm 28 tain Neithovilie Kuotsu-ia tanabuba jenjang ngutet. Pa Southern Angami Sports Association (SASA) tenüing nung melangteper aser senpet sen 1.80 lakh ngua liasü.

Tasembuba jenjang tongtetsang Vimezeto Zinyu (WAYO) nem senpet sen 15,000 aser pezübuba jenjang tongtetsang Zayievi Kikhi (SASA) nem senpet sen 10,000 agütsü. Iba category nung best tactician sempet Menuokhriezo Metha-ia nguteta pa nem sen 5,000 agüja liasü.

Tasembuba jenjang ya Kohima village nungi NASA tenüing nung melangteper Menuosetuo Yiese-ia tongteta senpet sen 1.40 lakh agütsü aser ano Nerhema yimtsüing nungi NASA tenüing nung melangteper Thejavizo Merhieso-ia pezübuba jenjang tongteta senpet sen 1 lakh agütsü.

Group category nung NASA-ia points 69.5 nguteta senpet sen 75,000 agütsü, WAYO tanabuba jenjang (60 points) tongteta senpet sen 45,000 agütsü. SASA aser CYO tasembuba (47 points) aser pezübuba (24.5 points) jenjang tongteta telok ana nem sen 30,000 agüja liasü.

Western Angami Youth

Sentong akhumdong ama MLA Kevipodi Sophie, chairman, DPDB Kohima aden aser iba asayamong shibangba sentong nung tetushi tesemdang Kethosituo Sekhose, Director, Youth Resources and Sports liasü.

**BILEMDANGANG**  
"Tekolok tilartem tia majung nem kokdaksür."